

Jurij Roscius † 1699; 6) Jurij Abraham Schmal abo Schmel z Komorowa † 1707; 7) Gottfried Gross z Grodka, čehnješe dale; 8) Jan Handrij Streng z Grodka † 1744; Jan Bohukhwał Streng, syn — 1774; 10) Bjedrich Leberecht Streng, syn Bohukhwała, † 1791; 11) Jan Leberecht Blütchen z Wětošowa † 1826; 12) Křesćan Ludwik Zilich — 1842; 13) Křesćan Bjedrich Happatz, z dobom wokřesny šulski inspektor, † 1854; 14) Karl Bjedrich Klahre, wot 1855.

Po zdaću hižo Strengowje a Blütchen z rodu Němcy, kiž pak hišće serbski předowachu, serbske Bože služby wjele wazili njejsu. Farař Zilich, tohorunja z rodu Němc, předowaše tež hišće něšto króć serbski, tola pak tak žałosnjnje, zo jeho wosadni prošachu, zo by sebi radšo jazyk njełamał; tuž pod nim wokoło lěta 1830 serbski kemš cyle zasta. — We šulach so tu ženje nič serbski wučilo a rěčało njeje, hdyž tež běchu wučerjo zwjetša Serbja.

We Łazu so z cyła wjacy serbski njepowěda, 5 starych ludźi snadź hišće serbski rozumi; po druhej bóle wěrje podobnej powěsći pak stari ludžo wšitecy hišće serbski rozumja. Mjena Łazowskich ležownosćow su zwjetša hišće serbske, kaž: Pudrika, Nowina, Penka, Gajk, Putkalenza (Pódkaleńca), Kaleńca. — W Kózlem je wokoło 20, we susodnej wjesy Góricu (Göritz) pječa hišće 1, w Grabicach wokoło 6, w Chwóšćiku drje hišće mjenje, w Brjazem pak nimale połojca Serbow. — W Huštanu wšitecy ludžo přez 50 lět stari serbscy wuměja, wot młódsich jenož někotři, džěci nič; z jenoho domu móžeše hišće 26-lětna holca derje serbski, korčmař pak, kaž wudawaše, nič njemóžeše, ale za to grawoćiwje němski rěčeše: n. př. äuzleř (= Šäufler), argem (= hergeben), abn (= haben), abyř (= aber) a t. d. Nó, hdyž budže tuta wosada cyle přeněmčena, změja tu němscy rěčespytnicy wulecy zajimawy nowy dialekt! W Brodkojcach je wot 16 hišće 8 domow serbskich, hdžež tež starši hišće z džěćimi „trochu“ serbski powědaju: „młogi wěc, młogi mjenje“. Wěsta stara Stefanowa je tam znata jako dobra Serbowka. Pisař B. Cerna w Khoćebuzu, rodź. Serb z Dubjego, pak wobswědčeše, zo staj tutej wsy Huštan a Brodkojce nimale hišće cyle serbskej a zo tam wšitecy serbski powědaju, hdyž tež młódsi radzi němcuja; haj same džěci je wón w Huštanu w samsnym l. 1880 při hrajkanju na wsy serbski rěčeć słyšał.